


OKRUŽNI PRIVREDNI SUD ISTOČNO SARAJEVO
Broj 61 0 St 007276 14 St
Istočno Sarajevo, 30.05.2014.g.



Okružni privredni sud Istočno Sarajevo, stečajni sudija Samra Akova, u stečajnom postupku nad imovinom pravnog lica **“Energoinvest” Rasklopna oprema a.d. Istočno Sarajevo, Vuka Karadžića 17, Istočno Sarajevo**, nakon ročišta za utvrđivanje uslova za otvaranje stečajnog postupka, dana 30.05.2014.god. donio je sledeće:

R J E Š E N J E

1. Otvara se stečajni postupak nad imovinom pravnog lica **“Energoinvest” Rasklopna oprema a.d. Istočno Sarajevo, Vuka Karadžića 17, Istočno Sarajevo, JIB 4400541890001, matični broj 89-02-0023-09.**
2. Za stečajnog upravnika imenuje se Vlado Simović iz Foče sa liste stečajnih upravnika.
3. Pozivaju se povjerioci da u roku od 30 dana od dana objavljivanja oglasa u SL Glasniku RS prijave svoja potraživanja sudu u dva primjerka sa dokazima pozivom na br 61 0 St 007276 14 St. Uz prijavu povjerioci su dužni priložiti dokaz o uplaćenju taksi na prijavu potraživanja u iznosu 1% od visine prijavljenog potraživanja, s tim da ista ne može biti manja od 50,00 KM niti veća od 10.000,00 KM, a koja se ima uplatiti u korist Budžeta RS.
4. Pozivaju se dužnici stečajnog dužnika da svoje dugove prema stečajnom dužniku izmire bez odlaganja.
5. Pozivaju se povjerioci da u roku od 30 dana obavjeste stečajnog upravnika koja prava obezbjeđenja potražuju na predmetima imovine stečajnog dužnika.
6. Određuje se upis zabilježbe o otvaranju stečajnog postupka u Registru Okružnog privrednog suda Istočno Sarajevo.
7. Zakazuje se ročište za ispitivanje prijava potraživanja za dan **PETAK 12.09.2014.god. u 10:00 sati.** Odmah nakon ispitnog ročišta održat će se i izvještajno ročište.
8. Oglas o otvaranju stečajnog postupka objavit će se istog dana kad je i doneseno, odnosno dana 30.05.2014.god. na oglasnoj ploči suda i u Službenom glasniku RS, te će isto biti dostavljeno nadležnom Tužilaštvu.

O b r a z l o ž e n j e

Predlagatelj Komunalno preduzeće “Vodovod i kanalizacija” a.d. Istočno Sarajevo kao povjerilac stečajnog dužnika, podnio je sudu dana 07.04.2014. godine prijedlog za pokretanje stečajnog postupka nad imovinom pravnog lica **“Energoinvest” Rasklopna oprema a.d. Istočno Sarajevo, Vuka Karadžića 17, Istočno Sarajevo.** Prijedlog je podnesen radi neizmirivanja pravosnažnog Rješenja o izvršenju duže od 60 dana. Potraživanja povjerioca odnose se na dug stečajnog dužnika za isporučenu vodu koji po računima i pravosnažnom Rješenju o izvršenju iznosi 214.257,15 KM. U prilogu Prijedloga dostavljeno je pravosnažno Rješenje o izvršenju Okružnog privrednog suda Istočno Sarajevo br 61 0 Ip 006784 13 Kom od 09.12.2013.god, te i Prijava potraživanja na iznos glavnog duga 214.257,15 KM, 130.699,83 na ime zakonske zatezne kamate i iznos od 2.142,50 KM na ime troškova izvršnog postupka, navodeći i račun predlagatelja na koji se iznos potraživanja ima isplatiti.

Sud je prije donošenja rješenja o otvaranju stečajnog postupka saslušao zakonskog zastupnika stečajnog dužnika, a predlagatelj je po nalogu suda uplatio iznos od 5.000,00 KM na ime predujma troškova stečajnog postupka.

Iz Rješenja o izvršenju od 09.12.2013.god., koje je postalo pravosnažno dana 20.12.2013.god., kao i iz isprava u spisu br 61 0 Ip 006784 13 Kom proističe da je predlagač kao tražilac izvršenja podnio prijedlog za izvršenje na osnovu vjerodostojne isprave dana 15.11.2013.god., protiv stečajnog dužnika, da je sud dozvolio predloženo izvršenje na novčanim sredstvima izvršenika koja se vode kod banaka, a sve radi prinudne naplate potraživanja u iznosu od 214.257,15 KM sa zakonskom zateznom kamatom na pojedinačno ispostavljene račune od dana dospelosti svakog od računa pa do isplate, te istim rješenjem odredio troškove izvršnog postupka u iznosu od 2.142,50 KM. Rješenje o izvršenju je postalo pravosnažno na dan 20.12.2013.god. Izvršni sud je Rješenje o izvršenju dostavio UniCredit banci na provođenje dana 03.02.2014.god., a navedena banka je Dopisom od 06.02.2014.god. obavijestila sud da je račun izvršenika blokiran, da izvršenik već duže vrijeme nema prometa po računu, kao i da je putem MT199 poruke obavijestila ostale banke kod kojih izvršenik ima otvoren račun. Do dana podnošenja prijedloga za otvaranje stečajnog postupka Rješenje o izvršenju predlagaču nije izmireno, dakle, duže od 60 dana od dana dostavljanja banci na provođenje.

Iz iskaza zakonskog zastupnika stečajnog dužnika proističe da stečajni dužnik praktično ne vrši nikakve poslovne aktivnosti iz razloga što je početkom januara 2013. godine sva imovina i pokretna i nepokretna zaplijenjena od strane Poreske uprave RS, nad kojom je imala založno pravo, koje je stečajni dužnik 2012. godine dao da bi ispunio dogovor sa Vladom RS o finansiranju pokretanja proizvodnje stečajnog dužnika. Stečajnom dužniku su u januaru 2013. godine zapečaćene sve prostorije, sem tri kancelarije i praktično oduzeta sva imovina od strane Poreske uprave. U postupku procjene te imovine koju je radio sudski vještak po nalogu Poreske uprave stečajni dužnik je smatrajući da je prenisko procjenjena vrijednost, uložio žalbu koja nije uvažena i nakon čega je pokrenuo upravni spor kod Okružnog suda Istočno Sarajevo, koji je donio Presudu kojom se tužba uvažava i nalaže Poreskoj upravi da ponovi postupak, međutim, Presuda je donesena dana 24.01.2014.god., a u tom momentu sva imovina je već bila prodana u izvršnom postupku. Zakonski zastupnik je naveo da je stav stečajnog dužnika da se ne dozvoli otvaranje stečajnog postupka prije nego što se utvrdi da li je imovina prodana na zakonit način, odnosno da se stečajni postupak otvori nakon okončanja sporova koje je pokrenuo stečajni dužnik.

Iz naprijed izloženog proističe da u odnosu na predlagača stečajni dužnik ima zasnovanu novčanu obavezu utvrđenu pravosnažnim Rješenjem o izvršenju koje se nije moglo izmiriti duže od 60 dana, pa se u smislu čl. 48. stav 2. Zakona o stečajnom postupku prihvata dokazanom obaveza dužnika i nemogućnost da istu obavezu plati, tim više što i iz iskaza zakonskog zastupnika proističe da stečajni dužnik nije u stanju izmiriti ovu svoju obavezu. Neosnovan je prijedlog stečajnog dužnika da se otvaranje stečajnog postupka odloži do okončanja postupaka koje je pokrenuo stečajni dužnik, budući da se navedeni postupci mogu nastaviti i voditi i nakon otvaranja stečajnog postupka, s tim da o tome odluku dalje donose organi stečajnog postupka. Predlagač je predumio iznos od 5.000,00 KM na ime troškova stečajnog postupka, pa kako je prijedlog dopušten, kako postoji stečajni razlog iz člana 6. stav 1. i 3. Zakona o stečajnom postupku, to su ispunjeni uslovi za otvaranje stečajnog postupka iz čl. 47. stav 4. a u vezi sa članom 48. stav 2., pa je sud donio odluku kao u izreci.



POUKA:

Protiv ovog rješenja može se izjaviti žalba Višem privrednom sudu Banja Luka u roku od 8 dana od dana objavljivanja u Sl. Glasniku RS. Žalba se podnosi putem ovog suda.